

INTERLINGUA = IL.

IL. es lingua auxiliare internationale, quale resulta ex labores de « Academia pro Interlingua ».

In IL. omne vocabulo es internationale in forma de thema (radice) latino sine grammatica. Qui scribe in IL. supprime omne elemento de grammatica non necessario.

Inde cum simplice auxilio de vocabulario latino-lingua nationale (diffuso in omne natione), vos intellige raro vocabulos de IL. non intelligibile ad primo visu

Alphabeta latino-anglo: a, b, c, d, e, f, g, h, i, j, k, l, m, n, o, p, q, r, s, t, u, v, w, x, y, z.

Orthographia latino: *æterno, habile, philosophia, teatro...* Si vos adopta orthographia non latino, vocabulario latino in plure casu non es apto pro consultatione.

Accentu - Super vocale que præcedit ultimo consonante, si existe.

Casu - Non existe in IL: casu latino resulta ex positione, aut per præpositiones *de, ad, ab, in...*

Plurale - Es indicato per suffixo *-s*: singulare *monte, flore*; plurale *montes, flores*.

Genere - Genere naturale pote es indicato per *mas, femina*; cane *mas, cane femina*. Genere grammaticale es inutile; in idem modo concordantia de adjectivo cum substantivo es inutile.

Articulo - Non existe in IL. Ex.: Vos da ad me libro, illo libro, meo libro, illo meo libro, uno meo libro.

Gradu de adjectivo es indicato cum voces disjuncto; Ex.: *breve, plus breve, magis breve, multo breve, trans breve, ultra breve, extra breve*.

Adverbio ex adjectivo - Plure vice es indicato etiam cum voces disjuncto: *Petro stude cum mente diligente, scribe in forma elegante, loque in modo claro, canta forte, curre veloce, dormi per longo tempore*.

Numeros - uno, duo, tres, quatuor... decem, centum, mille, millione; decem et uno = 11; sex decem = 60.

VERBO - Non habe suffixo de persona; *me habe, te habe, illo habe, nos habe, vos habe, illos habe*.

Tempore de verbo - Si phrasi jam indica tempore, suffixo es inutile; Ex.: *heri nos scribe, cras nos lege*. Tempores pote es indicato cum: *heri, jam, in præterito, hodie, cras, in proximo tempore, in futuro. Me voi scribe, me debe scribe, me i scribe*.

Modo de verbo - Conjunctivo es indicato cum: *si, que, ut...*

Infinitivo - Non habe suffixo; ex.: *stude, excelle, adopta...*

Flexione -nte de participio præsentis latino (ama)nte habe internationalitate maximo; pote es eliminato per relatione: *studente = que stude, mittente = que mitte*.

Participio passivo latino regulare aut irregulare, plure vice vive in derivatos anglo et habe amplo internationalitate. Nos pote elimina illo per inversione: « filio es amato ab matre » = « matre ama filio ».

Publicatione in IL. es multo præferibile quam publicatione in aliquo lingua nationale; non es necessario versione de tale articulos in altero linguas, per causa quod lectore comprehende originale scripto ab auctore.

CONCLUSIONE: Pro interesse de vos, pro commune utilitate, vos debe mitte quota de associatione ad Academia pro Interlingua, et abbonamento ad Revista « Schola et Vita ».

ACADEMIA PRO INTERLINGUA

Praesidente G. PEANO - Prof. in Universitate de Torino
Cavoretto - Torino

Thesaurario Ing. G. CANESI - Via Costigliole 1, Torino 105

Quota de Associatione ad Academia Fr. 10 per anno

Torino,

1928.

In die 27 de proximo mense Augusto, illustre studioso, mathematico, interlinguista Prof. P E A N O perveni ad 70° anno.

Iam duo consocio, uno de Polonia et alio de Anglia in littera separato, invita nos ad assume iniciativa per testifica ad nostro illustre et caro Prae-

sidente nostro affectuoso aestimatione.

Nos cum laeto animo approba propositione et propone:

1. aut: Publica in suo honore «NUMERO SPECIALE» redacto ab honorato collegas, ab affectionato suo discipulos, ab aestimato consocios de A. P. I. et abbonato de «SCHOLA ET VITA».

2. aut: Realiza desiderio de Prof. PEANO cum publicatione de Supplemento ad suo splendido «Vocabulario commune ad usu de Interlinguistas». In fine de pagina VI de isto Vocabulario, Professore PEANO scribe:

« N o s s p e r a d e p u b l i c a S u p p l e m e n t o a d V o c a b u l a r i o c o n t i n e n t e v o c a b u l o s i n t e r n a t i o n a l e n o n l a t i n o ».

3. aut: Si voluntario contributione de consocio non suffice per uno de superindicato propositione: dedica ad Illo uno fasciculo de SCHOLA ET VITA.

Nos confida in concorde opinione et collaboratione.

Tamen, ante communica iniciativa ad omne consocio, nos desidera
interpella fideles consocio que ab plure anno seque infatigabile et
multo utile labore de nostro honorato Praesidente.

Vos pote offer ad nos novo propositione, consilio, approbatione.

In relatione ad responsos nos determina publicatione opportuno
et communica deliberatione ad omne consocio (excepto Prof. PEANO)
ut consequere collaboratione morale et materiale.

Dum attende responso, nos offer ad vos cordiale salutatione.

Prof. MASTROPAOLO Nicola - Directore de "SCHOLA et VITA";

Ing. G. CANESI - Thesaurario de A. P. I.

Post scripto. - Dirige responso ad:

Ing. G. CANESI - Via Costigliole N° 1. - T O R I N O 105.

Nos praefer responso in Interlingua: es grato etiam responso in
~~lingua anglo - franco - germanico - hispano - italiano.~~